

Premias per 2014 s'augmentan per 2,2%

Dapli medis e dapli premias

DA LUCAS DEPLAZES / ANR



■ **Tenor il minister da la sanadad publica, Alain Berset, s'augmentan las premias per las cassas da malsauns l'onn proxim mo moderat. La survista presentada demussa grondas differenzas tranter ils chantuns.** L'onn proxim s'augmentan las premias per las cassas da malsauns en media per 2,2%. Quai correspunda ad 8 francs e 42 raps il mais. L'augment en ils singuls chantuns variescha dad 1,0% fin 3,8%. En 7 chantuns munta l'augment mo 2%. Tschintg chantuns ston quintar cun dapli che 3%. En il chantun Grischun èsi da quintar cun in auzament da dus procents. Las premias per ils uffants vegnan augmentadas l'auter onn pli ferm, numnadamain per 2,6%. In pau main aut èn las premias per giuvenils, quellas custan l'auter onn 2,2% dapli.

Repartiziun dals custs da var 26 milliardas

Ils custs da var 26 milliardas francs per l'onn proxim che las cassas da malsauns ston surpigliar vegnan repartids sco suonda: Ils ospitals e las clinics quintan cun ina quota da 21,6%. Per il servetsch ambulat (medis da chasa) muntan ils custs a 21,2% e per ils medicaments 20%. Las prestaziuns ambulantas dals ospitals vegnan calculadas sin 13,9 u 1,3% dapli che l'onn passà cun 12,6%. Las prestaziuns da las chasas da tgira fan or 6,4%. Las ulte-

Nagin consens tranter ils medis

Cun ina iniziativa dal pievel prentendan ils medis da chasa in rinforz da lur posiziun professiunala ed ina meglra indemnizaziun per lur prestaziuns. Il parlament ha acceptà lur propostas. Las correcturas duain vegnir realisadas en connex cun la revisiun da las tariffas. Finamira da las tractativas era da metter a disposiziun per ils medis da chasa 200 milliuns francs. Las tractativas tranter las organisaziuns involvadas han fatg naufragi. Ils medis-spezialists n'hajan fatg naginas concessiuns en favur da lur collegas. La medema situaziun hai gia dà en connex cun l'introducziun da «Tarmed» l'onn 2004.

In rinforz essenzial dals medis da chasa è la cundiziun imperativa per la retratga da l'iniziativa. Ussa sto cusseglier federal Alain Berset decider. El ha pretendi tar la revisiun da las tariffas da mantegnair la neutralitad dals custs. Ils iniziants ston uss decider ils proxims dis sch'els vulan retrair lur iniziativa u sch'els laschan giuditgar il pievel davart lur situaziun.

riuras prestaziuns èn calculadas cun 10,7%. Cun 4,3% èn ils custs per l'administraziun in zichel pli bas che l'onn avant.

Tenor las explicaziuns da cusseglier federal Alain Berset a chaschun da la conferenza da medias a Berna èsi difficil da calcular las premias per l'onn proxim che sa basan sin las experientschas e sin prognosas. Quellas dependan la finala da las prestaziuns dumandadas da noss pievel. En mintga cas ston las premias per las cassas da malsauns covrir ils custs, ha punctuà Berset. La pli gronda part dals assicurads preferescha in model da premias cun ina franchisa pli auta ch'ils 300 francs da las premias-standard. Berset ha constatà che ils models cun restricziuns da l'elecziun dals medis sco HMO u models da medi da chasa han prendi tiers surproporzionalmain pervia dals rabats sin las premias.

Dapli medis – dapli custs

Cusseglier federal Alain Berset ha fatg attent a la relaziun tranter il dumber da praticas da medis ed il svilup dals custs. In grond augment per dumondas d'avrir novas praticas han ins constatà suenter la dismessa dal stop per novs medis. Dapi il mais da fanadur 2013

han ils chantuns puspè la pussaivladad da limitar las lubientschas per novas praticas, quai che ha nizzegià la mesadad dals chantuns.

Stabilitad tar ils medicaments

Sin il sector dals medicaments ha l'Uffizi federal per la sanadad publica pretendi reducziuns dals pretschs per circa

500 medicaments, quai che munta ina reducziun dals custs da 200 milliuns francs. Per il mais da november 2013 e 2014 èn previdas ulteriuras reducziuns dals pretschs per medicaments. Davent da l'onn 2015 resultan ordlonder respargns da var 720 milliuns francs.

➤ PUGN DA VESTA

Ils custs per la sanadad

Var 65 milliardas francs l'onn custa la sanadad publica en Svizra, quai munta a passa 11% dal product naziunal brut. L'onn 1996 ha il suveran svizzer acceptà l'obligatori per las cassas da malsauns. Questa midada ha procurà per ina reducziun dal dumber dallas cassas da malsauns dad in pèr tschient sin actualmain 61 cassas da malsauns. Vegnevan bleras cassas da malsauns manadas pli baud en uffizi parzial e sco lavur accessoria, prentenda la situaziun dad oz ina direcziun pli professionalisada, quai che ha augmentà ils custs administrativs.

L'onn 1996 custavan las prestaziuns medicinalas per mintga persuna

1491 francs. Fin l'onn 2012 èn s'augmentads ils custs per 99,8% sin 2791 francs per persuna.

Onn per onn s'augmentan ils custs per la sanadad publica per 3%–5%, pia bler pli massiv che la chareschia. Grosso modo vegnan ils custs per la sanadad da 65 milliardas francs repartids sco suonda:

cassas da malsauns	25 milliardas
chantuns	*25–30 milliardas
assicuranzas suplementaras, privats, autras instituziuns	var 10 milliardas

* Actualmain è la repartiziun dals custs tranter las cassas da malsauns ed ils chantuns different. Davent da l'onn 2017 surpiglian las cassas da malsauns 45% ed ils chantuns 55%.